

# HARANGVE

PRONONCEE

EN LA SALE DV

petit Bourbon, le 27. Octobre  
1614. à l'ouuerture des Estats te-  
nus à Paris.

*Par Reuerend P. en Dieu, Meſſire DENIS  
SIMON DE MARQUEMONT,  
Conſeiller du Roy en ſes Conſeils d'Eſtat &  
Priné, Archeueſque Comte de Lyon, &  
Primat de France.*



A PARIS,

EN LA BOVTIQUE DE NIVELLE.

Chez SEBASTIEN CRAMOISY, rue  
Saint Iaqués aux Cicognes.

---

M. DCXV.

*Avec Priuilege du Roy.*

Case

F. O.

39

1326

1615 mah

THE NEWBERRY  
LIBRARY



*H A R A N G V E P R O -*  
*noncée en la Salle du petit*  
*Bourbon, le 27. Octobre 1614.*  
*à l'ouverture des Estats tenus*  
*à Paris.*



*I R E,*

La felicité de ce siecle à  
commencé par vostre naissance,  
elle s'est renouuëe à vostre re-  
gne, & vostre Majorité en a asseu-  
ré la duree, remarque du temps si  
salutaire, qu'elle porte nos esprits  
au delà du temps, & nous oblige  
d'adorer l'eternelle providence de  
Dieu qui l'a ainsi ordonné pour fai-  
re cognoistre qu'il vous a mis au

A ij

monde, afin que vous en foyez l'exemple, la gloire de ceste Couronne, le soulagement & les delices de vos peuples.

Les labeurs heroïques de HENRY LE GRAND vostre Pere, la sagesse incomparable de la Reine vostre Mere, & vos propres vertus, ont seruy de cause seconde à nostre bien. Ce grand Prince d'immortelle memoire a fondé la tranquillité, destruit la diuision, releué la dignité & la splendeur ancienne de la France.

Au coucher deplorable de ce Soleil, ceste Auguste Princesse vostre mere, par sa magnanimité estonna le mal-heur, d'estourna l'orage, & dissipa tous les nuages & les broüillars qui en d'autres minoritez auoient troublé & obscurcy le Ciel de cest estat, qu'elle a depuis main-



renu en paix & tranquillité au dedans, en a conserué & accru la reputation au dehors, ses loüanges passent nos discours, & sa prudence merite le mesme éloge qu'une grande lumiere de l'Eglise a donné au courage de Debora, une vefue gouuerne heureusement les peuples, une vefue enuoye les armées, une vefue choisit les Capitaines, une vefue marche en campagne, une vefue ordonne les triumphes.

Le Ciel qui l'a opposée a nostre malheur, & qui nous l'a donnée par l'heureuse naissance & excellente nourriture de vostre Majesté, luy face voir tres-longues années, la prosperité de vostre personne, & de vostre Estat, & vostre regne fortifié, de la continuation de ses conseils, & du bon-heur de sa presence, produise les merueilles que le

monde attend de ses genereuses inclinations que vous auez a toutes les vertus.

La pieté est la premiere, aussi est-ce le fondement de toutes les autres, c'est la gloire des Roys, c'est le rampart de leurs Estats, en vous elle est desia en sa fleur, le fruit qu'elle promet remplit nos cœurs d'alegresse, & nous assure que tant qu'elle demeurera en vostre ame Royale, la felicité demeurera en vostre Monarchie. Elle l'a fait durer plus qu'aucune autre, l'a renduë florissante & victorieuse, toute la terre a admiré le zele des Roys tres-Chrestiens, au service de Dieu, & à la protection de l'Eglise, vous en estes, SIRE, le premier fils, & les Prelats & autres Ecclesiastiques, dont est composé le Clergé de vostre Royaume, représenté par ce

grand & honorable nombre de Deputez qui sont icy, & qui m'ont chargé de vous faire ce tres-humble remercyment. Ce sont les dispensateurs de ses sacremens & de ses misteres, Pasteurs de la bergerie de Dieu, interpretes de ses oracles. Nous auons les tables de la loy pour enseigner aux peuples la crainte de Dieu & l'obeïssance du Roy, la verge pour les conduire, la manne pour les nourrir.

Tels que nous sommes, SIRE, nous sommes vos tres-humbles & obeïssans subjects, qui ayât l'honneur d'estre les premiers entre les ordres de vostre Royaume, ne serons iamais deuancez en la pureté de l'affection, en la constance de la fidelité, & au merite de l'obeïssance que nous deuons à vostre Majesté; nous sommes nez avec ce deb-

voir, & vos merites en accroissent tous les iours l'obligation. Car la pureté avec laquelle vous adorez & seruez Dieu, attire des ja mille benedictions sur vous, & sur nous pour l'amour de vous. La felicité d'Auguste est la felicité del'Empire. La felicité du Roy sert de Ciel au Royaume, comme le Nil à l'Egypte. Les peuples anciens exigeoient de leur Prince la prosperité, comme chose, disoient ils, que bien faisant il leur pouuoit obtenir du Ciel, iamais Rome ne sceut honnorer d'auantage les Empe-reurs qu'en s'attribuant à leur vertu la felicité de leur siecle.

Ceste pieté, ( SIRE ) accompagnée de felicité, secondée de la prudence, nous fait esperer que ceste assemblée conuoquée par vostre commandement reüssira à la gloire



gloire de Dieu, à l'exaltation de son Eglise, au service de vostre Majesté, au bien de cest estat, à ces points auxquels nous auons dressé nos intentions. Nous reduirons aussi le cahier de nos remonstrances que nous tiendrons prest le plustost qu'il nous sera possible pour le presenter à vostre Majesté.

Laquelle ne pouuoit entrer dans les années de sa Majorité, sous les plus heureux auspices pour aller au deuant de tout ce qui pourroit à l'aduenir troubler la felicité, de laquelle en naissant vous fustes obligé à ce siecle. Car vostre Royale autorité appliquee avec effect aux plaintes & supplications des Estats, sera vn baulme tres-excellent, dont l'odeur & la fragrance fera courir & redoubler l'amour & l'obeissance de vos subjects, & la

vertu guerira & consolidera toutes les playes & blesseures que les troubles & desordres passez ont laissé encor en vostre Estat. La saison ne fust iamais si oportune à bien faire, car Dieu mercy ceste assemblée n'est pas comme ont esté quasi toutes les precedentes, vn remede necessaire à la violence d'un grand & pesant mal. C'est plustost vn bon vent qui arriue à vne douce & tranquille nauigation, adioustant les effects à l'esperance, la constance au bon-heur, & la feureté au repos.

Les paroles nous manquent pour exprimer le contentement & le ressentiment que nous auons de ce bien. Beaucoup moins sont elles capables de rendre les graces tres-humbles que nous en deuons à vostre Maiesté. Il faut que nostre si-

lence parle , que nostre humilité  
 remercie. Nous vous supplions  
 tres-humblement , SIRE , iuger  
 de nos paroles par la veritable affe-  
 ction de nos cœurs , comme en iu-  
 ge Dieu Tout-puissant , duquel  
 vous estes vne image viuante. Et  
 non pas de nos cœurs par la foi-  
 blesse de nos paroles , cōme en iu-  
 gent les hommes , nous ne respi-  
 rons que vostre seruice, ne souhait-  
 tons que vostre contentement, &  
 vostre grandeur , en nous l'ardeur  
 de ceste deuotion ne s'esteindra ia-  
 mais , le temps ne fera que renfla-  
 mer , l'Eglise ne sçait que c'est d'in-  
 constance, c'est l'espouse du fils de  
 Dieu, elle a la Lune sous les pieds. Et  
 son espoux estāt l'autheur des iustes  
 & legitimes dominations, comme  
 est la vostre , & ayant commandé  
 aux subiects d'aymer, honorer &

Obeyr à leur Roy, receura pour sacrifice agreable les vœux & prieres tres-ardentes que nous luy faisons, & ferons tous les iours de nos vies, avec tout l'effort de nos cœurs, avec toute l'affection de nos ames, qu'il luy plaise espancher abondamment ses graces sur vostre Majesté: Que vous soyiez le plus religieux, le plus iuste, & plus victorieux Prince qu'aye iamais veu le Soleil, que tous vos subiects vnis au giron de l'Eglise par l'exemple de vostre pieté, & tout l'Orient vaincu & dompté par vos armées, vous remettiez la sainte & triomphante Croix sur les murailles de Hierusalem. Que chery du Ciel & honoré du monde vous voyez heureusement fermer ce siecle, qui s'est ouuert à vostre naissance. Et qu'en fin à tant de Couronnes qui



auront orné vostre chef en terre,  
 vous adioustiez celle de l'immor-  
 talité, dont iouyssent desia bien-  
 heureux, les Clouis, les Charle-  
 maignes, les Roberts, & les Louys  
 vos predecesseurs, & qui est prépa-  
 rée dans le Ciel à tous les Princes  
 qui en leur vie auront aymé l'Egli-  
 se, auront honoré la religion, & la  
 pieté.

F I N.

---

*Extraict du Priuilege du Roy.*

**P**AR grace & priuilege du Roy, il est permis à SEBASTIEN CRAMOYSI, Marchand Libraire Iuré en l'Vniuersité de Paris: d'imprimer où faire imprimer, & mettre en vente, *la Harangue pronôcee en la Sale du petit Bourbon, le 27. Octobre 1614. à l'ouuerture des Estats tenus à Paris,* Par Reuerend Pere en Dieu Messire DENIS SIMON DE MARQUEMONT, Conseiller du Roy en ses Conseils d'Estat & Priné, Archeuesque, Comte de Lyon, & Primat de France. Faisant tres-expresses deffenses à tous Libraires, & Imprimeurs ou autres de nos subjets de quelque qualité ou condition qu'ils soient, d'imprimer ou faire imprimer ladite Harangue &c. la vendre faire vendre debiter, ny distribuer par nostre Royaume, sous pretexte de quelque addition, changement, ou autre forme de déguisement qu'on y pourroit apporter, durant le temps & espace de six ans entiers & accomplis, sur peine aux contreuenans de mil liures d'amende, & de confiscation des exēplaires, & de tous despens dommages & interests, comme il est plus amplement déclaré és lettres de priuilege, donnees à Paris ce 16. Mars 1615. & de nostre regne le cinquiesme.

*Par le Roy en son Conseil.*

L E F E B V R E.



